

BOSNA I HERCEGOVINA  
FEDERACIJA BOSNE I HERCEGOVINE  
**VLADA**

BOSNIA AND HERZEGOVINA  
FEDERATION OF BOSNIA AND HERZEGOVINA  
**GOVERNMENT**

БОСНА И ХЕРЦЕГОВИНА  
ФЕДЕРАЦИЈА БОСНЕ И ХЕРЦЕГОВИНЕ  
**ВЛАДА**

Broj: 03-02-885/2024  
Sarajevo, 14.03.2025. godine

**PARLAMENT FEDERACIJE  
BOSNE I HERCEGOVINE**

- Predstavnički dom -  
gosp. Dragan Mioković, predsjedavajući ✓
- Dom naroda -  
gosp. Tomislav Martinović, predsjedavajući

Bosna i Hercegovina  
Federacija Bosne i Hercegovine  
**PARLAMENT FEDERACIJE  
SARAJEVO**

Primljeno: 17-03-2025			
Org. jed.	Broj	Priloga	Vrijednost
01 02	- 02 -	701	125

B  
11

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), **radi razmatranja i prihvatanja, dostavljam Vam NACRT ZAKONA O GASU FEDERACIJE BOSNE I HERCEGOVINE**, koji je utvrdila Vlada Federacije Bosne i Hercegovine na 50. sjednici, održanoj 13.03.2025. godine.

Nacrt zakona se dostavlja na službenim jezicima i pismima Federacije Bosne i Hercegovine, u printanoj i elektronskoj formi (CD).

S poštovanjem,



**PREMIJER**  
Nermin Nikšić

- Prilog:
- Nacrt zakona na bosanskom jeziku (CD),
  - Izjava o usklađenosti,
  - Obrazac broj 2 i
  - Obrazac IFP-DA

Co: Federalno ministarstvo energije, rudarstva i industrije  
gosp. Vedran Lakić, ministar

Parliament of Canada  
 Le Parlement du Canada  
**PARLIAMENTARY OFFICE**  
 BUREAU PARLEMENTAIRE

Particulars			
Qty.	Unit	Rate	Amount

  


**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**„E1“**

**NACRT**

**ZAKON O GASU  
FEDERACIJE BOSNE I HERCEGOVINE**

**Sarajevo, mart 2025. godine**

**ZAKON O GASU**  
**FEDERACIJE BOSNE I HERCEGOVINE**

**DIO PRVI - OSNOVNE ODREDBE**

**Član 1.**

(Predmet zakona)

(1) Ovim zakonom uređuju se energetska politika i planiranje, energetske djelatnosti, dozvola za obavljanje djelatnosti i regulisanje energetske djelatnosti u sektoru prirodnog gasa, proizvodnja prirodnog gasa, distribucija prirodnog gasa, snabdijevanje prirodnim gasom, trgovina prirodnim gasom, skladištenje prirodnog gasa, upravljanje terminalom za utečnjeni prirodni gas, upravljanje mjestima za snabdijevanje utečnjenim prirodnim gasom i komprimovanim prirodnim gasom, prava i obaveze krajnjih kupaca, sigurnost snabdijevanja, izgradnja, korištenje i održavanje objekata gasne infrastrukture, upravni nadzor i regulatorno nadgledanje te druga pitanja od značaja za uređivanje sektora prirodnog gasa u Federaciji Bosne i Hercegovine (u daljnjem tekstu: Federacija).

(2) Ovim zakonom se djelimično preuzimaju odredbe Direktive 2009/73/EZ Evropskog parlamenta i Vijeća od 13. jula 2009. o zajedničkim pravilima za unutrašnje tržište prirodnog gasa i stavljanju izvan snage Direktive 2003/55/EZ.

**Član 2.**

(Ciljevi energetske politike i primjena zakona)

- (1) Osnovni ciljevi ostvarivanja energetske politike u sektoru prirodnog gasa su:
- a) obezbjeđenje sigurnog snabdijevanja kupaca prirodnim gasom po definisanim standardima kvaliteta i pristupačnim cijenama,
  - b) obezbjeđenje sigurnog, pouzdanog i efikasnog rada, održavanja i razvoja sistema za distribuciju prirodnog gasa i pružanje propisanog kvaliteta usluga distribucije prirodnog gasa,
  - c) efikasna regulacija djelatnosti u sektoru prirodnog gasa,
  - d) zaštita prava i interesa korisnika sistema, uključujući pravo pristupa mreži, sigurnost i kvalitet snabdijevanja, dostupnost prirodnog gasa,
  - e) razvoj konkurentnog tržišta prirodnog gasa,
  - f) obezbjeđenje efikasnog razdvajanja operatora distributivnog sistema i obezbjeđenje njegove nezavisnosti od drugih djelatnosti,
  - g) obezbjeđenje uslova za nesmetano izvršavanje obaveza javne usluge,
  - h) stvaranje uslova za investicije u sektoru prirodnog gasa,
  - i) obezbjeđenje dugoročne uravnoteženosti i promovisanje održivog razvoja sektora prirodnog gasa,
  - j) povezivanje sa regionalnim tržištima,

- k) usklađivanje razvoja sektora prirodnog gasa sa energetsom i ekonomskom politikom Federacije,
  - l) racionalno i ekonomično korištenje prirodnog gasa i zaštita okoliša,
  - m) usklađivanje sa propisima Evropske unije radi uspostavljanja pravnog i institucionalnog okvira u skladu sa pravnim naslijeđem Evropske unije.
- (2) Odredbe ovog zakona primjenjuju se na biogas i druge vrste gasova, ukoliko se ti gasovi mogu tehnički i sigurno transportovati kroz sisteme prirodnog gasa.

### **Član 3.**

(Načela)

Ovaj zakon se zasniva na načelima nediskriminacije, pravičnosti, transparentnosti, tržišne konkurencije, regulisanog pristupa treće strane, slobode kretanja robe i pružanja usluga, zaštite prava krajnjih kupaca i drugih učesnika na tržištu, zaštite javnog interesa i zaštite okoliša, te slobode izbora snabdjevača prirodnim gasom.

### **Član 4.**

(Opšti interes Federacije)

Opšti interes Federacije je obezbjeđenje i isporuka prirodnog gasa za život i rad građana kao i poslovanje i razvoj privrednih i društvenih subjekata, na siguran, pouzdan i kvalitetan način.

### **Član 5.**

(Odnos sa drugim zakonima)

- (1) Na sva pitanja koja nisu uređena ovim zakonom primjenjuju se propisi kojima se uređuju oblasti energije i regulacije energetske djelatnosti, prostornog planiranja i korištenja zemljišta, građenja, trgovine, zaštite potrošača, zaštite od požara, zaštite okoliša i koncesija, te drugi propisi kojima se uređuju pojedine oblasti.
- (2) U postupku odlučivanja o pojedinačnim pravima i obavezama energetske djelatnosti subjekata koji obavljaju djelatnosti u sektoru prirodnog gasa i krajnjih kupaca, ako ovim zakonom nije drugačije propisano, primjenjuju se odredbe Zakona o upravnom postupku („Službene novine FBiH“, br. 2/98, 48/99 i 61/22).

### **Član 6.**

(Definicija pojedinih izraza)

Pojedini izrazi upotrebljeni u ovom zakonu imaju sljedeća značenja:

- a) "Balansna odgovornost" znači obavezu učesnika na tržištu da uravnoteže količinu prirodnog gasa na ulazu u sistem i izlazu iz sistema u periodu za koji se utvrđuje balansno odstupanje i preuzmu finansijsku odgovornost za odstupanje;

- b) "Direktni gasovod" je gasovod koji povezuje proizvođača prirodnog gasa sa izolovanim objektom krajnjeg kupca i nije dio transportnog ili distributivnog sistema;
- c) "Distribucija" je prenošenje prirodnog gasa distributivnim sistemom radi isporuke prirodnog gasa krajnjim kupcima, ali ne uključuje snabdijevanje prirodnim gasom;
- d) "Energetski subjekt" znači pravno ili fizičko lice koje obavlja jednu od energetskih djelatnosti u sektoru prirodnog gasa;
- e) „Gasni sistem“ znači transportni sistem, distributivni sistem, terminale za utečnjeni prirodni gas i/ili sistem za skladište prirodnog gasa koji su u vlasništvu i/ili kojima upravlja određeni energetski subjekat, uključujući operativnu akumulaciju i njegove objekte za pružanje pomoćnih usluga te objekte koji pripadaju povezanim privrednim društvima, a koji su potrebni za pružanje pristupa transportu, distribuciji i terminalima za utečnjeni prirodni gas;
- f) "Isporuka" znači primopredaju prirodnog gasa na mjestu određenom za isporuku;
- g) "Javni snabdijevač" označava energetskog subjekta koji snabdijeva prirodnim gasom male kupce, kupce iz kategorije domaćinstva i krajnje kupce od posebnog društvenog značaja koji nisu izabrali snabdjevača na tržištu;
- h) "Javno snabdijevanje" znači javnu uslugu snabdijevanja prirodnim gasom krajnjih kupaca iz kategorije domaćinstva, malih kupaca i krajnjih kupaca od posebnog društvenog značaja, pod uslovima propisanim ovim zakonom;
- i) "Komprimovani prirodni gas" znači prirodni gas u gasovitom stanju koji je komprimovan na pritisak veći od 100 bara (eng. "*compressed natural gas*" - CNG);
- j) "Korisnik sistema" znači fizičko ili pravno lice koje isporučuje ili preuzima prirodni gas putem distributivnog sistema, uključujući i krajnjeg kupca;
- k) "Krajnji kupac" označava kupca koji kupuje prirodni gas za vlastitu upotrebu;
- l) "Krajnji kupac od posebnog društvenog značaja" označava subjekta čiji su objekti priključeni na distributivni sistem prirodnog gasa i koji obavljaju djelatnosti i poslove odgojno-obrazovnih, humanitarnih, socijalnih, vjerskih ustanova, organizacija, udruženja, poslove zapošljavanja i smještaja posebnih kategorija lica i druge poslove od društvenog značaja koje odlukom odredi Regulatorna komisija;
- m) "Kupac iz kategorije domaćinstva" označava kupca koji kupuje prirodni gas za upotrebu u vlastitom domaćinstvu, isključujući komercijalne ili profesionalne djelatnosti;
- n) "Mali kupac" je krajnji kupac čija je godišnja potrošnja prirodnog gasa do 100.000 m<sup>3</sup> i čiji su objekti priključeni na distributivni sistem prirodnog gasa;
- o) "Mjerno mjesto" označava mjesto na kojem se mjernim uređajima mjeri zapremina prirodnog gasa kojeg korisnik sistema preuzima, odnosno isporučuje u sistem;
- p) "Mjesto priključenja" označava mjesto u kojem se priključak spaja na distributivni ili transportni sistem;

- q) "Mreža proizvodnih gasovoda" znači gasovod ili mrežu gasovoda koji su izgrađeni kao dio projekta eksploatacije nafte ili prirodnog gasa ili se koriste za dovođenje prirodnog gasa iz jednog ili više takvih projekata u postrojenje za preradu ili terminal;
- r) "Nestandardne usluge" su usluge koje pružaju energetske subjekti na zahtjev korisnika sistema ili drugih lica, ili u cilju otklanjanja posljedica postupanja korisnika suprotno propisima, a koje nisu obuhvaćene regulisanim naknadama za korištenje ili priključenje na sistem;
- s) "Operator distributivnog sistema" znači pravno lice koje je odgovorno za rad, upravljanje, održavanje i razvoj distributivnog sistema na određenom geografskom području i njegovo povezivanje sa drugim sistemima, te za osiguranje dugoročne sposobnosti sistema da zadovolji razumnu potražnju za distribucijom prirodnog gasa na ekonomski primjeren način;
- t) "Objekat gasne infrastrukture" označava gasovode, kompresorske, regulacione, mjerno-regulacione i mjerne stanice, bušotine, skladišta prirodnog gasa i druge objekte i infrastrukturu potrebnu za funkcionisanje gasnog sistema;
- u) "Operator terminala za utečnjeni prirodni gas" označava pravno lice koje obavlja djelatnost utečnjavanja prirodnog gasa ili prihvata, iskrcavanja i ponovnog gasificiranja utečnjelog prirodnog gasa te je odgovorna za rad terminala za utečnjeni prirodni gas;
- v) "Operator sistema" označava operatora distributivnog sistema ili operatora transportnog sistema;
- w) "Operator skladišta prirodnog gasa" označava pravno lice koje obavlja djelatnost skladištenja i odgovorna je za rad skladišta prirodnog gasa;
- x) "Operator zatvorenog distributivnog sistema" označava pravno lice koje obavlja energetske djelatnosti distribucije prirodnog gasa u zatvorenom distributivnom sistemu;
- y) "Pomoćne usluge" označavaju usluge potrebne za sigurno i pouzdano funkcionisanje transportnog ili distributivnog sistema, terminala za utečnjeni prirodni gas ili skladišta prirodnog gasa te kontinuirano i kvalitetno snabdijevanje kupaca prirodnim gasom;
- z) "Priključak" označava gasne vodove za isporuku prirodnog gasa od mjesta priključenja na distributivni sistem do glavnog zapornog organa na ulazu u objekat, uključujući mjerni uređaj i opremu;
- aa) "Prirodni gas" je roba koja ima kvalitet, namjenu, uslove prodaje i cijenu, na čiju se proizvodnju, distribuciju, snabdijevanje, trgovinu, skladištenje i kompresovanje primjenjuju odredbe ovog zakona;
- bb) "Pristup sistemu" znači pravo na priključenje i/ili korištenje distributivnog sistema, terminala za utečnjeni prirodni gas i skladišta prirodnog gasa prema regulisanim uslovima i objavljenim tarifama;
- cc) "Proizvodnja prirodnog gasa" znači postupak kojim se u proizvodnom postrojenju postiže da prirodni gas zadovoljava uslove o kvalitetu prirodnog gasa nakon njegovog

- eksploatacije koja se odvija prema propisima iz oblasti energetike i rudarstva, da bi se mogao sigurno transportovati ili distribuirati kroz gasni sistem radi prodaje i isporuke;
- dd) "Regulatorni period" znači vremenski period za koji se određuju regulisane naknade ili cijene;
- ee) "Rezervni snabdjevač" znači snabdjevača koji ima obavezu da krajnjeg kupca snabdijeva prirodnim gasom u slučaju kada ga odabrani snabdjevač prestane snabdijevati;
- ff) "Rezervno snabdijevanje" znači javnu uslugu snabdijevanja prirodnim gasom krajnjih kupaca koji su ostali bez snabdjevača pod uslovima propisanim ovim zakonom;
- gg) "Skladište prirodnog gasa" znači objekat koji se koristi za skladištenje prirodnog gasa, uključujući dio terminala za ukapljeni prirodni gas koji se koristi za skladištenje, ali isključujući dio koji se koristi za proizvodne radnje i objekte koji su namijenjeni isključivo obavljanju funkcija operatora transportnih sistema;
- hh) "Skladištenje" znači utiskivanje prirodnog gasa u skladište prirodnog gasa, skladištenje prirodnog gasa u radnoj zapremini skladišta i povlačenje prirodnog gasa iz skladišta;
- ii) "Snabdijevanje" znači prodaju prirodnog gasa krajnjim kupcima, uključujući i preprodaju;
- jj) "Snabdjevač" znači pravno lice koje obavlja djelatnost snabdijevanja krajnjih kupaca prirodnim gasom;
- kk) "Tarifa" označava naknadu ili više naknada za korištenje distributivnog sistema ili usluge u vezi sa prirodnim gasom;
- ll) "Terminal za utečnjeni prirodni gas" znači terminal koji se koristi za utečnjavanje prirodnog gasa ili prihvatanje, otpremanje i ponovno gasificiranje utečnjenog prirodnog gasa, uključujući privremeno skladištenje potrebno za postupak ponovne gasifikacije i daljnju isporuku u gasni sistem, ali isključujući dijelove terminala za utečnjeni prirodni gas koji se koriste za skladištenje;
- mm) "Transport" označava prenos prirodnog gasa kroz gasovode pritiska većeg od 16 bara sa ciljem isporuke prirodnog gasa krajnjim korisnicima ili operatorima distributivnog sistema, isključujući snabdijevanje prirodnim gasom;
- nn) "Trgovac" znači pravno lice koje obavlja djelatnost trgovine prirodnim gasom;
- oo) „Unutrašnja gasna instalacija" znači skup instalacija i uređaja iza glavnog zapornog organa na distributivnom sistemu, uključujući gasne aparate, ventilacione otvore, sistem za dovod zraka za sagorijevanje i odvod produkata sagorijevanja, zaključno sa izlazom odlaznih gasova u atmosferu;
- pp) "Utečnjeni prirodni gas" znači pročišćeni prirodni gas koji je rashlađivanjem pretvoren u tekuće stanje (eng. "liquified natural gas" - LNG);
- qq) "Vertikalno integrisani subjekt" znači energetska subjekt ili grupa energetskih subjekata u kojima ista osoba ili iste osobe imaju mogućnost direktne ili indirektno kontrole i gdje energetska subjekt ili grupa energetskih subjekata obavlja najmanje jednu od energetskih djelatnosti transporta, distribucije, upravljanja terminalom za

utečnjavanje prirodnog gasa ili skladištenja prirodnog gasa te najmanje jednu od energetske djelatnosti proizvodnje ili snabdijevanja prirodnim gasom;

(2) Izrazi koji nisu definisani odredbama ovog zakona imaju značenja koja su utvrđena zakonima kojim se uređuju pojedine oblasti energetike.

## **DIO DRUGI - ENERGETSKA POLITIKA I PLANIRANJE**

### **Član 7.**

(Provođenje energetske politike u sektoru prirodnog gasa)

Vlada Federacije Bosne i Hercegovine (u daljnjem tekstu: Vlada Federacije) provodi energetske politiku i planira razvoj u sektoru prirodnog gasa u skladu sa ciljevima i strateškim dokumentima definisanim zakonom kojim se uređuje oblast energije i regulacije energetske djelatnosti.

### **Član 8.**

(Bilans prirodnog gasa)

(1) Vlada Federacije, na prijedlog Federalnog ministarstva energije, rudarstva i industrije (u daljnjem tekstu: Ministarstvo), do kraja oktobra tekuće godine donosi godišnji i trogodišnji bilans prirodnog gasa.

(2) Bilansom prirodnog gasa planira se ukupna potrošnja prirodnog gasa u Federaciji, način snabdijevanja, struktura potrošnje i potreban nivo rezervnih kapaciteta za sigurno snabdijevanje kupaca prirodnim gasom.

(3) Bilans prirodnog gasa posebno sadrži:

- a) godišnji i mjesečne planove potrošnje;
- b) plan i način osiguranja potrebnih količina prirodnog gasa,
- c) mjere za slučaj prekida u dobavi prirodnog gasa,
- d) plan remonta, revitalizacije i rekonstrukcije gasne infrastrukture,
- e) planove rezervi kapaciteta.

(4) Energetski subjekti i druga lica dužni su da na zahtjev Ministarstva dostave podatke potrebne za izradu bilansa prirodnog gasa u roku od 30 dana od dana dostavljanja zahtjeva.

(5) Bilans prirodnog gasa objavljuje se na internet stranici Ministarstva.

(6) Ministarstvo prati ostvarenje bilansa prirodnog gasa te upozorava Vladu Federacije i predlaže mjere u slučaju značajnijih odstupanja.

## DIO TREĆI – ENERGETSKE DJELATNOSTI U SEKTORU PRIRODNOG GASA

### Član 9.

(Energetske djelatnosti u sektoru prirodnog gasa)

- (1) Energetske djelatnosti u sektoru prirodnog gasa u smislu ovog zakona su:
  - a) proizvodnja prirodnog gasa,
  - b) distribucija prirodnog gasa,
  - c) distribucija prirodnog gasa u zatvorenom distributivnom sistemu,
  - d) snabdijevanje prirodnim gasom,
  - e) trgovina prirodnim gasom,
  - f) skladištenje prirodnog gasa,
  - g) upravljanje terminalom za utečnjeni prirodni gas,
  - h) upravljanje mjestom za snabdijevanje utečnjenim prirodnim gasom, i
  - i) upravljanje mjestom za snabdijevanje komprimovanim prirodnim gasom.
- (2) Energetske djelatnosti u sektoru prirodnog gasa obavljaju se kao tržišne djelatnosti u skladu sa pravilima kojim se uređuju odnosi na tržištu ili kao javna usluga.
- (3) Energetska djelatnost distribucije prirodnog gasa obavlja se kao javna usluga prema uslovima utvrđenim ovim zakonom.
- (4) Energetska djelatnost snabdijevanja prirodnim gasom obavlja se kao tržišna djelatnosti ili kao javna usluga na osnovu odluke Vlade Federacije.
- (5) Energetske djelatnosti distribucije prirodnog gasa u zatvorenom distributivnom sistemu, skladištenja prirodnog gasa i upravljanja terminalom za utečnjeni prirodni gas obavljaju se kao tržišne djelatnosti prema regulisanim uslovima pristupa treće strane utvrđenim ovim zakonom.
- (6) Energetske djelatnosti u sektoru prirodnog gasa koje ovim zakonom ili odlukom Vlade Federacije donesenom u skladu sa odredbama ovog zakona, nisu utvrđene kao javna usluga obavljaju se kao tržišne djelatnosti.
- (7) Energetske djelatnosti distribucije prirodnog gasa, skladištenja prirodnog gasa i upravljanja terminalom za utečnjeni prirodni gas mogu se obavljati unutar istog energetskog subjekta koji djeluje kao kombinovani operator.
- (8) Kombinovani operator iz stava (7) ovog člana ima sva prava i obaveze propisane ovim zakonom za operatore pojedinačnih djelatnosti koje obavlja.

### Član 10.

(Javna usluga)

- (1) Energetskom subjektu iz sektora prirodnog gasa može se, ukoliko je to u općem ekonomskom interesu, nametnuti obaveza javne usluge po regulisanim uslovima koja se može odnositi na sigurnost snabdijevanja, tehničku bezbjednost, kontinuitet, kvalitet i

cijenu snabdijevanja te zaštitu okoliša, uključujući energetska efikasnost, upotrebu energije iz obnovljivih izvora i zaštitu okoliša i klime.

(2) Obaveza javne usluge mora biti jasno definisana, transparentna, nediskriminirajuća i provjerljiva i javno objavljena, te mora garantovati domaćim i stranim subjektima ravnopravnost pristupa krajnjim kupcima.

(3) Energetski subjekt koji energetska djelatnost obavlja kao javnu uslugu dužan je obezbijediti:

- a) sigurnost snabdijevanja prirodnim gasom,
- b) propisani, odnosno ugovoreni kvalitet snabdijevanja prirodnim gasom,
- c) primjenu razumnih, lako i jasno uporedivih, javnih i nediskriminatorских cijena određenih u skladu sa ovim zakonom,
- d) primjenu mjera zaštite okoliša, zaštitu života, zdravlja i imovine građana, u skladu sa posebnim propisima,
- e) primjenu mjera zaštite krajnjih kupaca,
- f) druge uslove propisane dozvolom za obavljanje djelatnosti i odlukom kojom je energetskom subjektu nametnuta obaveza pružanja javne usluge.

#### **Član 11.**

(Izveštavanje o javnoj usluzi)

(1) Vlada Federacije putem nadležne institucije Bosne i Hercegovine obavještava Sekretarijat Energetske zajednice o svim mjerama donesenim u cilju pružanja javne usluge i njihovom mogućem uticaju na tržišnu konkurenciju.

(2) Vlada Federacije, svake dvije godine, putem nadležne institucije Bosne i Hercegovine, obavještava Sekretarijat Energetske zajednice o svim promjenama koje su u vezi sa mjerama iz stava (1) ovog člana.

#### **Član 12.**

(Tržišne djelatnosti)

Tržišne djelatnosti obavljaju se uz poštovanje načela tržišne konkurencije i ravnopravnog položaja svih učesnika na tržištu, gdje se slobodno dogovaraju i/ili ugovaraju količine i cijene isporučenog prirodnog gasa.

#### **Član 13.**

(Računovodstveno razdvajanje)

(1) Energetski subjekti koji obavljaju više djelatnosti u sektoru prirodnog gasa ili uz energetska djelatnost obavljaju i drugu djelatnost, dužni su u svom internom računovodstvu voditi poslovne knjige na način koji omogućava finansijsko izvještavanje po poslovnim segmentima za svaku djelatnost odvojeno, u skladu sa propisima kojima se uređuje oblast računovodstva i revizije.

(2) Energetski subjekt koji obavlja djelatnost snabdijevanja sa obavezom javne usluge dužan je u svom internom računovodstvu odvojeno voditi poslovne knjige na način koji omogućava finansijsko izvještavanje po poslovnim segmentima za djelatnost snabdijevanja koja se obavlja kao javna usluga u odnosu na tržišnu djelatnost, u skladu sa propisima kojima se uređuje oblast računovodstva i revizije.

(3) Energetski subjekti dužni su da utvrde pravila za raspoređivanje zajedničkih bilansnih pozicija koja se primjenjuju pri izradi računovodstvenih internih obračuna po djelatnostima.

#### **Član 14.**

(Pristup treće strane)

(1) Proizvođač prirodnog gasa, operator distributivnog sistema, operator skladišta prirodnog gasa i operator terminala za utečnjeni prirodni gas dužni su osigurati efikasan i nediskriminirajući pristup mreži proizvodnih gasovoda, distributivnom sistemu, skladištu prirodnog gasa, odnosno terminalu za utečnjeni prirodni gas u skladu sa odredbama ovog zakona.

(2) Pristup distributivnom sistemu, skladištu prirodnog gasa i terminalu za utečnjeni prirodni gas omogućuje se primjenom regulisanog pristupa treće strane.

(3) Pristup mreži proizvodnih gasovoda omogućuje se primjenom pregovaračkog pristupa treće strane.

(4) Regulisani pristup treće strane zasniva se na objavljenom tarifnom sistemu, metodologijama za utvrđivanje tarifa i regulisanim cijenama za korištenje usluga energetskih subjekata.

(5) Pregovarački pristup treće strane zasniva se na komercijalnim uslovima pristupa koji su predmet pregovora.

#### **Član 15.**

(Pravo na žalbu)

(1) Protiv akta kojim se određuju uslovi pristupa, odbija ili ograničava pristup distributivnom sistemu, skladištu prirodnog gasa ili terminalu za utečnjeni prirodni gas može se izjaviti žalba Regulatornoj komisiji za energiju u Federaciji Bosne i Hercegovine (u daljnjem tekstu: Regulatorna komisija) u roku od 15 dana od dana prijema akta nadležnog energetskog subjekta.

(2) Žalba se podnosi posredstvom nadležnog energetskog subjekta, koji je dužan da postupi po žalbi u skladu sa pravilima upravnog postupka.

(3) Odluka Regulatorne komisije o žalbi donosi se u roku od 60 dana od dana dostavljanja žalbe.

(4) Ukoliko Regulatorna komisija traži dodatne informacije rok iz stava (3) ovog člana produžava se za dodatnih 60 dana od dana dostavljanja traženih informacija.

(5) Protiv konačne odluke Regulatorne komisije iz stava (3) ovog člana stranka može pokrenuti upravni spor podnošenjem tužbe nadležnom sudu u roku od 30 dana od dana prijema odluke.

## **DIO ČETVRTI - DOZVOLA ZA OBAVLJANJE DJELATNOSTI U SEKTORU PRIRODNOG GASA**

### **Član 16.**

(Dozvola za obavljanje djelatnosti)

(1) Dozvola za obavljanje energetske djelatnosti u sektoru prirodnog gasa (u daljnjem tekstu: dozvola) je akt Regulatorne komisije kojim se energetski subjekt ovlašćuje da obavlja određenu energetska djelatnost.

(2) Energetska djelatnost može da obavlja energetski subjekt koji ima dozvolu za obavljanje energetske djelatnosti, osim ukoliko je ovim zakonom propisano drugačije.

(3) Energetski subjekt je dužan ispunjavati uslove propisane dozvolom za obavljanje energetske djelatnosti.

### **Član 17.**

(Vrste dozvola)

Regulatorna komisija izdaje sljedeće dozvole za obavljanje energetskih djelatnosti u sektoru prirodnog gasa:

- a) dozvola za obavljanje djelatnosti proizvodnje prirodnog gasa,
- b) dozvola za obavljanje djelatnosti distribucije prirodnog gasa,
- c) dozvola za obavljanje djelatnosti distribucije prirodnog gasa u zatvorenom distributivnom sistemu,
- d) dozvola za obavljanje djelatnosti snabdijevanja i trgovine prirodnim gasom,
- e) dozvola za obavljanje djelatnosti skladištenja prirodnog gasa,
- f) dozvola za obavljanje djelatnosti upravljanja terminalnom za utečnjeni prirodni gas,
- g) dozvola za upravljanje mjestom za snabdijevanje utečnjenim prirodnim gasom, i
- h) dozvola za upravljanje mjestom za snabdijevanje komprimovanim prirodnim gasom.

### **Član 18.**

(Period važenja dozvole)

(1) Dozvola za obavljanje djelatnosti se izdaje na period do 30 godina za djelatnosti proizvodnje prirodnog gasa, distribucije prirodnog gasa, distribucije prirodnog gasa u zatvorenom distributivnom sistemu, skladištenja prirodnog gasa i upravljanja terminalom za utečnjeni prirodni gas, a za ostale djelatnosti na period do pet godina.

(2) Dozvola se može obnoviti na zahtjev energetske subjekta u skladu sa pravilima o izdavanju dozvola.

### **Član 19.**

(Kriteriji za izdavanje dozvole)

(1) Dozvola se izdaje energetske subjektu ako:

- a) je upisan u odgovarajući registar poslovnih subjekata na osnovu kojeg se omogućava obavljanje energetske djelatnosti za koju se izdaje dozvola,
- b) ispunjava tehničke, operativne i organizacione uslove za rad,
- c) posjeduje dokaz o pravnom osnovu za korištenje objekata gasne infrastrukture koji se koriste za obavljanje energetske djelatnosti,
- d) ispunjava finansijske kriterije za obavljanje djelatnosti u zavisnosti od vrste djelatnosti, obima pružanja usluga,
- e) ispunjava propisane uslove u vezi sa stručnom osposobljenošću radnika za obavljanje poslova rukovanja i održavanja objekata gasne infrastrukture,
- f) ne traje mjera zabrane obavljanja energetske djelatnosti iz ovog zakona,
- g) ispunjava druge kriterije u skladu sa pravilima o izdavanju dozvola koje donosi Regulatorna komisija.

(2) Energetski subjekt dokazuje ispunjenost kriterija iz stava (1) ovog člana dostavljanjem odgovarajućih dokaza i dokumentacije uz zahtjev za izdavanje dozvole.

### **Član 20.**

(Izdavanje dozvole)

(1) Dozvolu za obavljanje energetske djelatnosti u sektoru prirodnog gasa, na osnovu podnesenog zahtjeva, izdaje Regulatorna komisija.

(2) Postupak izdavanja dozvole je javan i vodi se u skladu sa objektivnim i unaprijed poznatim kriterijima na nediskriminirajući i transparentan način.

(3) Regulatorna komisija dužna je da se prije izdavanja dozvole konsultuje sa zainteresovanim stranama o uslovima propisanim nacrtom dozvole.

(4) Konsultacije iz stava (3) ovog člana vrše se organizovanjem javne rasprave ili na drugi odgovarajući način koji utvrdi Regulatorna komisija.

(5) Rješenje Regulatorne komisije o zahtjevu za izdavanje dozvole sadrži detaljno obrazloženje i dostavlja se podnosiocu zahtjeva.

### **Član 21.**

(Izmjena dozvole)

(1) Imatelj dozvole podnosi Regulatornoj komisiji zahtjev za izmjenu dozvole, ukoliko u periodu važenja dozvole: